

GR 7.3.86

En pia memoria da:

Placi Hendry-Schmid, Sedrun

Cheuencunter san ins prender amauns nuot; Placi Hendry ha survegniu il clom e tut tgi che ha enconuschiu el - fa in retegn, schebi che sia vusch fuva vegnida brausla.


Placi Sigisbert Hendry-Schmid ei nasciuis ils 21 da fevrer 1916 a Cavorgia ed ei morts en siu siatontavel ils 20 da fevrer 1986. Pils ses ei il temps staus avoncaduras; el perencunter, el fuva daditg seremess.

Osum la greppa sil Crest a Cavorgia eis el vegnius gronds ed ils masets blaus silla suitga han dau agli cor. Ses onns d'affonza ein sefatgs in'andanta e cuort suenter l'otgavla classa ei il Placi Hendry ius naven da casa, ella Bassa, per emprender vitier. Mo en ton sco nuot ha siu bab Giachen Martin entschiet a pusignar; il Placi ei turnaus a Cavorgia - senza plibia. Dapi lu eis el semess el menaschi puril e cura ch'ins ha tratg siu bab Giachen Martin sin ina sliusa si Sedrun, eis el secavigliaus a pèr cun la mumma e culs faragliuns ed ha scochemai giu las lavurs enta maun.

Enzatgi ha detg agli ch'el seigi sperts sc'in utschi ed il Placi Hendry ha priu biaras caussas en vesta, malgrad ils onns pagadus ed il survetsch activ. Dasperas la lavour stentusa dil funs ha Placi Hendry entschiet ad ir a catscha ed el ei staus dapli ch'in catschadur permiezvi. Els uauls e si per la pezza eis el staus a pèr ad enzatgi; ils logs ein stai sia stanza da spetga. Enten prender peda eis el vegnius ruasseivels e duront il ruaus eis ei vegniu clar.

Entochen che Placi Hendry ei sedaus ora ed ha fatg si ina dunna, la Cecilia Schmid dil Plauin sogn Leci. Naven dil Crest tocca sut gassa, els praus grass, eis ei stau in pign tschancun e tut ei iu sco aua giu per canal. Cun quella sposa e dunna atras claus e clis e treis buobs e treis buobas sco schelai - ei cuida. Ed el, il Placi Hendry da Cavorgia, ha giu ina buna idea da ses affons. L'ura che la via ei vegnida teissa ed ei ida agradsi, ei la Cecilia stada sidretg ed ha tratg da detschiert da mintga vart. Sco per exemplu duront il liung temps che siu consort ha fatg cura a Tavau e silsuenter, il mument che Placi Hendry ei sefatgs mal ed ha piars in egl. Ulteriuras mangognas eindadas a dies e sia dunna ha adina puspei danovamein dau curascha.

Ei vegn ad esser stau ina greva ura, lezza ura che Placi Hendry e sia glieud han dau pietigot a Cavorgia, igl onn



1975, per secasar a Sedrun, enamiez Gonda, leu nua ch'el veva cumprau casa. Da Sedrun anora eis el ius di perdi a Cavorgia a pver ed a tarschinat il funs, sis onns ed aschia. Era buca cura che la casa ei barschada sin Gonda, ein el e sia famiglia semess a bandun, plitost sedustai vinavon e baghegiau ina nova. S'entelli ch'ei ha tuccau da schar pigliar e Placi Hendry ha fatg mal in pei, tondanavon ch'el ha fatg naven tut il muvel. Il fiug ed igt accident e la sperdita da tontas causas ch'el veva schi bugen, han tuttina spossau il Placi bravamein.

La malsogna dil zucher e l'asma han fatg ir il Placi Hendry davongiu e ses pass fuvan vegni cuorts, ils muments ch'el mava giu per via culla canna. - Ed enten vegnir dil meins ei il miedi Walter Scherrer segidaus bein e siu encuraschament ei staus da num. Ei fuva vegniu tard e surura ha Placi Hendry stuiu ir el spital a Glion. E leu ei zatgi seprius en pil malsaum; denton il miedi ed il spiritual han fatg persenn las uras.

Duront la sepultura ha ei neviu levet ed ils plaids migeivels da sur Giusep Cathomas ein secavigliai a pèr cun la neiv; tut plaids da gronda speronza che han levgiau igt adia.

Alla consorta Cecilia ed als affons detti Niessegner la fermezia dad ir vinavon ed al Placi Hendry in arriv pascheivel sils praus dil matg etern.

Vic Hendry